



Republika e Kosovës

Komuna e Drenasit

Kuvendi i Komunës



02 Nr. 060/04-28805 dt. 15/07/ 2026

## PROCESVERBAL

**I mbledhjes së Komitetit për Politikë dhe Financa, mbajtur më 18.06.2026, e cila filloi në orën 10:10.**

**Në mbledhje morën pjesë anëtarët e KPF-së: Burim Bujupi**, kryesues i Kuvendit, Fitore Morina-Hoxha (PDKRLL), Selman Çallapeku (PDKRLL), Pajtim Berisha (PDK), Arigon Sinani (PDK), Egzona Tërdevci (VV) dhe Arbër Halilaj (BD).

**Të pranishëm ishin edhe:** Enver Hoxha, Drejtor i Financave, Nexhmedin Gruda, Drejtor i Shërbimeve Publike dhe Emergjencave, Alban Zogaj, Drejtor i Kulturës, Rinisë dhe Sportit.

Mbledhjen e hapi dhe e kryesoi **Burim Bujupi**, kryesues i Kuvendit.

## RENDI I DITËS:

1. Procesverbali i mbledhjes së Komitetit për Politikë dhe Financa i dt. 25.05.2026;
2. Propozim vendim për financimin e projektit OJQ "Klubi KFF Feronikeli" Femra;
3. Propozim vendim për financimin e projektit për OJQ "Klubi i Futsallit FC "Liçeni";
4. Propozim vendim për financimin e projektit për OJQ "Shotë Galica";
5. Propozim vendim për financimin e projektit për OJQ "Klubi i volejbollit Gryka";
6. Propozim vendim për financimin e projektit për OJQ KV "Feronikeli Femrat";

7. Propozim vendim për financimin e projektit OJQ KV "Feronikeli Meshkujt";
8. Propozim vendim për financimin e projektit për OJQ "Klubi i Futsallit Drenasi";
9. Propozim vendim për financimin e projektit për OJQ "Klubi i Futbollit FC Feronikeli 74";
10. Propozim vendim për financimin e projektit për OJQ "Klubi i Futsallit Komorani"
11. Raporti i KRU "Prishtina", Dega në Drenas;
12. Raporti nga Kryeshefi i KRM "Pastrimi";
13. Draft Korniza Afatmesme Buxhetore Komunale 2027-2029;
14. Propozim vendim për Shfuqizimin e vendimit 02 Nr.020/04-19807 të datës 29.05.2026 për themelimin e komisionit për verifikimin e lejeve ndërtimore nga viti 2017 e deri në vitin 2026;
15. Të ndryshme.

**Kryesuesi i Kuvendit, Burim Bujupi**, pasi përshëndeti të pranishmit, hapi diskutimin për rendin e ditës.

**Egzona Tërdevci** theksoi se, lidhur me pikën 14 në shkresë nuk ka një kërkesë të prerë për shfuqizim dhe nuk thuhet që vendimi është në kundërshtim me ligjin. Ministria thjesht specifikon që nuk e ka të përcaktuar këtë procedurë, por ua lë në diskrecion komunës që të rregullojnë këtë çështje me ligjet e tjera në fuqi. Prandaj, propozoi se do të ishte më korrekte që kjo pikë të trajtohej si shqyrtim i ligjshmërisë apo diskutim mbi vendimin, sesa si shfuqizim.

**Kryesuesi i Kuvendit, Burim Bujupi** sqaroi se, përderisa Ministria konfirmon që komuna ka të drejtë të formojë një komision të tillë, nuk ka nevojë që ky vendim të dërgohet fare për ligjshmëri, ashtu siç veprohet edhe me komisionin rekomandues të formuar nga Zyra e Kryetarit.

Pas diskutimit, **kryesuesi Burim Bujupi**, hodhi në votim rendin e ditës. Për votuan 7 anëtarë, abstenime 0, kundër 0. Rendi i ditës miratohet dhe rekomandohet për Kuvend.

**Kryesuesi i Kuvendit, Burim Bujupi**, hapi diskutimin për pikën e parë të rendit të ditës.

**1. Procesverbali i mbledhjes së Komitetit për Politikë dhe Financa i datës 25.05.2026.**

Meqenëse nuk pati diskutime, pika u hodh në votim. Për votuan 7 anëtarë, abstenime 0, kundër 0.

**Kryesuesi i Kuvendit, Burim Bujupi**, hapi diskutimin për pikën e dytë të rendit të ditës.

**2. Propozim-vendim për financimin e projektit të OJQ-së „Klubi KFF Feronikeli“ (Femrat).**

**Egzona Tërdevci**, kërkoi që anëtarëve t'u vihen në dispozicion materialet e plota me të cilat kanë aplikuar klubet dhe organizatat. Ajo po ashtu theksoi nevojën për të pasur qasje në listën e aplikuesve të cilëve u janë refuzuar subvencionet, duke besuar që ekziston një raport i komisionit me listën dhe arsyet e refuzimit. Në rast se këto materiale nuk mund t'u dërgohen në këtë formë, do t'i kërkojë përmes kërkesës zyrtare për qasje në dokumente publike.

**Drejtor i Kulturës, Rinisë dhe Sportit, Alban Zogaj**, deklaroi se transparenca është 100% dhe se janë të gatshëm të ofrojnë cilindo dokument që anëtarët kanë dëshirë të shohin, përfshirë të dhënat se cilat OJQ janë përkrahur dhe cilat janë refuzuar.

**Kryesuesi i Kuvendit, Burim Bujupi**, pasi nuk pati diskutime të tjera e hodhi në votim pikën e dytë të rendit të ditës. **Propozim-vendim për financimin e projektit të OJQ-së „Klubi KFF Feronikeli“ (Femrat).** Për votuan 7 anëtarë, kundër 0, abstenime 0.

**Kryesuesi i Kuvendit, Burim Bujupi** prezantoi pikat nga numër 3 (tre) deri në numër 10 (dhjetë) të rendit të ditës. Të gjitha këto pika u miratuan në mënyrë unanime për t'u rekomanduar për Kuvend, me përjashtim të pikës. **8 (tettë) „Propozim-vendim për financimin e projektit për OJQ-të 'Klubi i Futsallit Drenasi'“.** Lidhur me këtë pikë, kryesuesi deklaroi se abstenon për shkak të konfliktit të interesit. Megjithatë, pika 8 kaloi dhe u rekomandua për Kuvend. Për votuan 6 anëtarë, kundër 0, abstenime 1.

**Kryesuesi i Kuvendit, Burim Bujupi**, hapi për diskutim pikën e njëmbëdhjetë të rendit të ditës. **11. Raporti i KRU „Prishtina“, Dega në Drenas.**

**Egzona Tërdevci** tha se, nuk është e drejtë të trajtohen njëjtë KRU „Prishtina“ dhe KRM „Pastrimi“, pasi të kompania „Pastrimi“ Komuna është aksionare, ndërsa KRU „Prishtina“ është një ndërmarrje qendrore që ka vetëm një degë në Drenas.

Së dyti, potencoi së trajtimi i këtij raporti në Komitet nuk ka kuptim, pasi kjo çështje tashmë është iniciuar për t'u trajtuar në një seancë të jashtëzakonshme të Kuvendit. Lidhur me këtë të fundit, shprehu një kritikë për voncën e thirrjes së seancës së jashtëzakonshme, duke kujtuar se afati ligjor për ftesë është tri ditë. Duke parë urgjencën që kanë deklaruar vetë iniciatorët, ftesa për seancë pas një jave është e paarsyeshme dhe e vonuar, do të ishte më mirë të mos thirrej fare. Duhet të bisedohet me thirrësit e seancës dhe kjo pikë ose të trajtohet në një seancë të rregullt, ose, nëse trajtohet në seancën e jashtëzakonshme, të mos rekomandohet fare nga Komiteti për në Kuvend, për të shmangur një punë të dyfishtë.

**Kryesuesi i Kuvendit, Burim Bujupi** njoftoi se, gjatë mbledhjes solemne të dt.12.06.2026, e kishte njoftuar thirrësin e seancës, Artian Krasniqin, se ky raport ishte paraparë si pikë e rendit të ditës në mbledhjen e Komitetit. Sipas kryesuesit, z. Krasniqi i kishte kërkuar që të mos ndërhynte të asamblistët. Kryesuesi garantoj para anëtarëve se nuk ka kontaktuar asnjë asamblist për këtë çështje, pasi është e drejtë e secilit prej tyre të kërkojë seancë të jashtëzakonshme në momentin që mbledhet një e treta e nënshkrimeve të nevojshme. Sa i përket afatit prej një jave për mbajtjen e seancës, kryesuesi sqaroi se kishte kontaktuar sërish thirrësin e seancës për t'i sugjeruar që në mbledhje të ftohej edhe udhëheqësi i KRU „Prishtina“, me qëllim që të raportonte dhe të sqaronte arsyet e mungesës së ujit. Pas pranimi të këtij propozimi, KRU „Prishtina“ u njoftua përmes email-it, por zyrtarët e saj deklaruan se nuk kishin mundësi të merrnin pjesë para ditës së hënë. Kjo ishte arsyeja pse u vendos që seanca e jashtëzakonshme të caktohej për dt. 22.06.2026. Kryesuesi u shpreh se prapëseprapë është i mendimit që thirrja për seancë të jashtëzakonshme të tërhiqet, meqenëse kjo çështje tashmë është përfshirë si pikë e rendit të ditës.

**Pajtime Berisha** tha se, duke vlerësuar se seanca e jashtëzakonshme duhet të mbahet domosdoshmërisht, pasi për këtë qëllim janë dhënë edhe nënshkrimet e asamblistëve. Shtoi se ndonëse dihet që zgjidhja e problemit të ujit të pijshëm nuk varet drejtpërdrejt nga Komuna e Drenasit, është e nevojshme që të merren hapa konkretë për ta tejkaluar këtë situatë të rëndë.

**Drejtori i Shërbimeve Publike dhe Emergjencave, Nexhmedin Gruda** tha se, lidhur me këtë pikë të rendit të ditës theksoi se, së paku për arsye morale, menaxheri i degës në Drenas, z. Sokol, ose Kryeshefi i KRU „Prishtina“ nga Prishtina, do të duhej të vinin për t'u përballur me gjendjen dhe për të diskutuar në mbledhje.

**Arbër Halilaj**, i cili gjatë diskutimit për pikën 11 u shpreh se ky është një problem i madh dhe se zgjidhja e tij afatgjatë varet ekskluzivisht nga investimet e nivelit qendror. Megjithatë, duke qenë se bëhet fjalë për një problem emergjent, ai vlerësoi se në mbledhje duhet të ftohet Kryeshefi i KRU „Prishtina“ e jo vetëm drejtori i degës në Drenas. Tha se, kjo kompani inkason mjete në këtë rajon dhe po harrohet që fatura është një lloj kontrate, nëse njëra palë e shkel atë duke mos siguruar furnizim me ujë, atëherë është prishur marrëveshja me konsumatorin. Trajtimi i kësaj çështjeje në Komitet është shumë më i rëndësishëm sesa seanca e jashtëzakonshme, pasi sipas tij, mënyra se si është thirrur ajo seancë duket më shumë si marketing politik. Seanca e jashtëzakonshme nuk thirret me një nënshkrim të publikuar ku paraqiten gjashtë pika të rendit të ditës, të cilat realisht mund të përmbliidhen në një pikë të vetme. Është e domosdoshme që në seancë të ftohet kryeshefi për të paraqitur një plan emergjent dhe për të prezantuar para asamblesë masat që planifikojnë të ndërmarrin aktualisht. Tha se e përkrah këtë pikë të rendit të ditës, me kusht që të sigurohet pjesëmarrja e të dy përgjegjësve – si e atij të nivelit qendror, ashtu edhe e drejtorit të degës në Drenas.

**Kryesuesi i Kuvendit, Burim Bujupi** ndërhyri duke theksuar se, në cilësinë e kryesuesit, së bashku me Zyrën e Kuvendit dhe drejtorin përkatës, do të ushtrojnë presionin e duhur që, përveç raportit, kompania të ofrojë edhe informata shtesë rreth situatës së furnizimit me ujë në Drenas në vazhdimësi.

**Pajtime Berisha**, sheksoi se edhe drejtori e pohoi që po krijohen keqkuptime në terren, pasi banorët e komunës tonë po mendojnë që faji për mungesën e ujit të pijshëm qëndron të Komuna.

**Drejtori i Shërbimeve Publike dhe Emergjencave, Nexhmedin Gruda** sqaroi se, gjatë komunikimit me udhëheqësit e KRU „Prishtina“, ishin marrë vesh që ata të merrnin pjesë dhe të raportonin në seancën e rregullt të Kuvendit.

**Kryesuesi i Kuvendit, Burim Bujupi**, meqenëse kjo çështje është e paraparë si pikë e rendit të ditës edhe për seancën e Kuvendit, anëtarët e Komitetit ta njoftojnë thirrësin e seancës së jashtëzakonshme se nuk ka nevojë që këshilltarët komunalë të mbliidhen dy herë për të njëjtën temë. Zyrtarët e kompanisë nga Prishtina nuk do të vijnë dy herë për të njëjtën çështje, megjithatë mbetet në vullnetin e anëtarëve nëse dëshirojnë ta njoftojnë thirrësin.

**Egzona Tërdevci**, e cila i sugjeroi kryesuesit që t'i përcjellë thirrësit të seancës rekomandimin e përbashkët të Komitetit, që kjo pikë të diskutohet në seancën e rregullt. Tha se nuk ka as logjikë e as arsyeshmëri që e njëjta pikë të trajtohet në dy seanca të ndryshme.

**Kryesuesi i Kuvendit, Burim Bujupi** konstatoi se, të gjithë anëtarët e Komitetit pajtoheshin që të kontaktohet thirrësi i seancës së jashtëzakonshme, duke shprehur besimin se edhe ai do të jetë dakord që raportimi i KRU „Prishtina“ të bëhet drejtpërdrejt në seancën e rregullt të Kuvendit.

**Kryesuesi i Kuvendit, Burim Bujupi**, hapi për diskutim pikën e dymbëdhjetë të rendit të ditës.  
**12. Raporti nga Kryeshefi i KRM „Pastrimi“.**

**Egzona Tërdevci**, vuri në dukje mungesën e materialit, duke thënë se anëtarët nuk e kanë pranuar ende raportin e shkruar. Në rast se ky material nuk u dërgohet përpara seancës, pika do të mbetet vetëm në nivel informimi, pasi pa pasur dokumentacionin përpara, nuk mund të adresojnë apo të analizojnë asnjë çështje konkrete.

**Drejtori i Shërbimeve Publike dhe Emergjencave, Nexhmedin Gruda** sqaroi se, janë në kontakt të vazhdueshëm me KRM „Pastrimi“ dhe se ia kanë kërkuar raportin paraprakisht. Ai njoftoi se deri më sot raporti nuk ka arritur zyrtarisht në komunë, mirëpo menaxhmenti i kompanisë „Pastrimi“ ka konfirmuar se do të jetë i pranishëm në seancën e Kuvendit për të raportuar.

**Kryesuesi i Kuvendit, Burim Bujupi**, kërkoi që ky raport të bëhet gati sa më parë, në mënyrë që të dërgohet si material i rregullt përmes email-it të këshilltarët komunalë, me qëllim që ata të jenë të përgatitur për mbledhjen e rregullt të Kuvendit.

**Kryesuesi i Kuvendit, Burim Bujupi**, hapi për diskutim pikën e trembëdhjetë të rendit të ditës.  
**13. Draft-Korniza Afatmesme Buxhetore Komunale 2027–2029.**

**Egzona Tërdevci** tha se, këtë çështje e ka adresuar disa herë dhe ngriti shqetësimin për mosdefinimin e saktë të kodeve të projekteve. Ajo mori si shembull rastet kur figurojnë projekte si „asfaltimi në tri fshatra“, por pa u specifikuar se cilat rrugë konkretisht do të asfaltohen. Ajo shtoi se për asamblistët është shumë e vështirë të votojnë buxhetin kur nuk e dinë saktë se ku do të investohen mjetet. Për këtë arsye propozoi me mirëkuptim që të ketë një ndarje më të rregullt dhe specifike të projekteve (p.sh. për fushat sportive, të dihet se ku dhe sa fusha do të ndërtohen), gjë që do t'u ndihmonte shumë asamblistëve gjatë vendimmarrjes.

**Drejtori i Financave, Enver Hoxha** dha një sqarim teknik, duke treguar se problemi qëndron të sistemi PIP (Programi i Investimeve Publike), i cili ka hapësirë të kufizuar dhe nuk lejon përshkrime më të gjata të projekteve. Ai po ashtu përmendi se propozimet dhe procedurat zgjasin rreth tre muaj dhe kjo shpesh po shkakton vonesa ose humbje të projekteve.

**Egzona Tërdevci**, tha se e kupton kufizimin teknik që ka sistemi PIP, mirëpo pyeti nëse është e mundur që asamblistëve t'u vihet në dispozicion një raport i veçantë plotësues, ku sqarohet saktë se për cilat rrugë bëhet fjalë. Tha se qëllimi nuk është të ngarkohet drejtoria, por është parësore të dihet destinimi i saktë i projekteve përpara se të votohen. Nëse kjo nuk arrihet të bëhet për këtë mbledhje, të paktën të jetë gati për muajin gusht, kur edhe miratohet buxheti përfundimtar.

**Drejtori i Financave, Enver Hoxha**, u zotua se do t'u bëjë kërkesë zyrtare të gjitha programeve dhe nënprogrameve që dorëzojnë kërkesa për investime kapitale, që të specifikojnë dhe të sqarojnë secilën rrugë apo projekt, duke shprehur besimin se edhe ata do ta mirëkuptojnë këtë nevojë për transparencë.

**Kryesuesi i Kuvendit, Burim Bujupi**, duke potencuar se kjo çështje e kodimit të projekteve ka qenë temë diskutimi edhe gjatë punëtorisë së mbajtur, duke u pajtuar se është shumë mirë që për secilin investim kapital të dihet saktë se në cilën rrugë apo lagje do të realizohet.

**Egzona Tërdevci**, sqaroi se nuk kishte pasur mundësi të mernte pjesë në punëtori për shkak të angazhimeve të saj personale. Megjithatë, ajo ngrii si shqetësim faktin që ia kishte kërkuar draftin udhëheqësit të Zyrës së Kuvendit, e cili i kishte premtuar se do t'ia dërgonte, por ende nuk kishte pranuar asgjë. Nuk është korrekte që anëtarët që nuk mund të marrin pjesë në punëtori të mos trajtohen në mënyrë të barabartë dhe të mos kenë qasje në materialet dhe diskutimet që janë zhvilluar atje.

**Kryesuesi i Kuvendit, Burim Bujupi**, i dha të drejtë znj. Tërdevci dhe u zotua se do të angazhohet personalisht që t'i dërgohen të gjitha materialet dhe dokumentet e punës që janë trajtuar në atë punëtori. Pasi nuk pati diskutime të tjera, **kryesuesi**, e hodhi në votim pikën e trembëdhjetë të rendit të ditës. **13. Draft-Korniza Afatmesme Buxhetore Komunale 2027–2029. Për votuan 7, kundër 0, abstenime 0.**

**Kryesuesi i Kuvendit, Burim Bujupi**, hapi për diskutim pikën e katërmëdhjetë të rendit të ditës. **14. Propozim-vendim për Shfuqizimin e vendimit 02 Nr. 020/04-19807 të datës 29.05.2026 për themelimin e komisionit për verifikimin e lejeve ndërtimore nga viti 2017 e deri në vitin 2026.**

**Arigon Sinani**, theksoi se përderisa Ministria e Administrimit të Pushtetit Lokal (MAPL) nuk e ka kthyer vendimin si të jashtëligjshëm apo me kërkesë për shfuqizim dhe meqë Kuvendi tashmë e ka miratuar atë, propozimi i Kuvendit duhet të mbetet në fuqi. Ai shtoi se nuk ka nevojë që ky vendim të shfuqizohet dhe se situata aktuale është në rregull.

**Kryesuesi i Kuvendit, Burim Bujupi**, sqaroi se Komuna mund ta formojë përsëri një komision për verifikimin e lejeve ndërtimore, por këtë herë pa pasur nevojë që vendimi të dërgohet në Ministri për vlerësim të ligjshmërisë. Ky vendim specifik, i cili tashmë është dërguar për ligjshmëri, duhet të shfuqizohet patjetër.

**Arbër Halilaj**, propozoi si alternativë që një komision i tillë të formohet drejtpërdrejt nga Kryetari i Komunës, duke përfshirë në të edhe përfaqësues nga Drejtoria e Inspeksionit.

**kryesuesi Burim Bujupi**, hodhi në votim pikën e katërmëdhjetë të rendit të ditës për t'u rekomanduar për Kuvend. **Propozim-vendim për Shfuqizimin e vendimit 02 Nr. 020/04-19807 të datës 29.05.2026 për themelimin e komisionit për verifikimin e lejeve ndërtimore nga viti 2017 e deri në vitin 2026. Për votuan 4, kundër 3, abstenime 1.**

**Arbër Halilaj**, dha një sqarim rreth votimit, duke u shprehur se vota e tij mund të jetë keqkuptuar. Ai sqaroi se në seancë e ka votuar themelimin e këtij komisioni dhe vazhdon të jetë pro funksionalizimit të tij. Megjithatë, pas leximit të arsytimit, ai vuri në dukje se MAPL-ja, për çështje specifike, ka të drejtë t'i drejtohet një ministrie tjetër linje, siç ka vepruar në këtë rast me Ministrinë e Mjedisit, Planifikimit Hapësinor dhe Infrastrukturës. Kjo e fundit ka konstatuar se

procedura për formimin e këtij komisioni nuk është e rregulluar në nivel qendror dhe se ky akt mbetet në kompetencë të organeve komunale. Prandaj, z. Halilaj përsëriti propozimin që një komision i tillë të formohet nga Kryetari i Komunës dhe që Ministria të ofrojë sugjerimet përkatëse se si duhet të veprohet më tutje.

**Kryesuesi i Kuvendit, Burim Bujupi**, hapi për diskutim pikën e pesëmbëdhjetë (të fundit) të rendit të ditës. **15. Të ndryshme**

**Egzona Tërdevci**, e cila drejtoi një kërkesë te Drejtoria e Shërbimeve Publike dhe Emergjencave në emër të banorëve të lagjes Morina, lidhur me rrugën „Flamur Morina“, për vendosjen e ndriçimit publik. Ajo potencoi se kjo kërkesë është adresuar zyrtarisht edhe gjatë dëgjimeve buxhetore nga administratori i fshatit, dhe kërkoi të dijë nëse ka ndonjë përgjigje konkrete apo nëse kjo çështje thjesht duhet të regjistrohet si problem për t'u adresuar në të ardhmen.

**Drejtori i Shërbimeve Publike dhe Emergjencave, Nexhmedin Gruda**, u përgjigj se kjo çështje është në kompetencë të Drejtorisë së Infrastrukturës Lokale dhe se përgjigja zyrtare do të merret nga drejtori i asaj drejtorie.

**Pajtime Berisha**, paraqiti një propozim që të gjitha shkollat në komunën tonë, të cilat ende nuk e aplikojnë këtë praktikë, të pajisen me uniforma shkollore. Ky projekt do të realizohej me vetëfinancim nga prindërit. Tha se vendosja e uniformave standarde do të kontribuonte drejtpërdrejt në rritjen e barazisë sociale ndërmjet nxënësve, do të rriste disiplinën dhe do të mundësonte një identifikim më të lehtë e më të sigurt të nxënësve brenda dhe jashtë ambienteve shkollore.

**Kryesuesi Burim Bujupi**, deklaroi se pasi nuk pati diskutime pyetje apo sygjerime të tjera, e shaplli mbledhjen e mbyllur.

**Mbledhja përfundoi në orën 11:20.**

**Procesmbajtësja: Fakete Hoti**

**Lekturoi: Nikelinda Bujupi**

**Kryesuesi i Kuvendit**  
  
**Burim Bujupi**

